

समे – 12:25 hrs.

<><><><><><>

Poonch-Encounter

सुरक्षाबलें पुंछ सैक्टर च कब्ज़ा रेखा दे नेड़े द'उं आतंकवादिएं गी मारी-मुकांदे होई कब्ज़ा रेखा दे पारा थमां घुसपैठ दी कोशश गी नाकाम बनाई दिता ऐ। सोशल मीडिया दी इक पोस्ट च फौज दी व्हाइट नाईट कोर नै जानकारी दिती ऐ जे सुरक्षाबलें दी फौरी ते सटीक कार्रवाई नै दुश्मन दे भैड़े मन्सूबे गी नाकाम बनाया ऐ। एहदे शा पैहले कब्ज़ा रेखा दे नेड़े संदिग्ध नक्लोहरकत दिक्खने परैन्त सोहगे जवानें घुसपैठिएं गी ललकारेया जेहदे पर दपक्खी गोलीबारी होई ते द'उं आतंकवादी मारे गे। इस अभियान दी कामयाबी च सुरक्षाबलें ते जम्मू-कश्मीर पुलस दे तालमेल ते खूफिया जानकारियें बड़ी महत्वै आहली भूमिका निभाई ऐ।

<><><><><><>

Nagrota-Terror Ass

आतंकवाद दे खलाफ इक बड़्डी कामयाबी हासल करदे होई जम्मू पुलसै नगरोटा दे टीसीपी नाके थमां आतंकवादिएं दे इक सैहयोग गी हिरासत च लैता ऐ जेहड़ा कश्मीर बक्खी जाने दी कोशत करै करदा हा। सोशल मीडिया दी इक पोस्ट च जिला पुलस जम्मू नै जानकारी दिती ऐ जे आरोपी दी पन्छान अज़ान हमीद गाज़ी दे तौर पर कीती गई ऐ ते ओहदे कब्ज़े शा त्रै पस्तौलां, मैगज़ीनां ते कारतूस बरामद कीते गे न। जिस गड़्डी च ओह सफर करा'रदा हा उसी

कब्जे च लेई लैता गेआ ऐ ते इस सरबंध्यै च नगरोटा पुलस थाने च मामला दर्ज करियै अगड़ी तफ्तीश शुरू करी दिती गई ऐ।

<><><><><><>

Amarnath-Yatra

श्री अमरनाथ जी दी जातरा गी अज्ज बड़लै भारी बरखा दे मददेनज़र पहलगाम ते बालटाल आहले दौनें रस्तेया रोकी दिता गेआ ऐ। कश्मीर दे डिवीजनल कमिशनर विजय कुमार बिधुरी होरे आखेआ जे खराब मौसम करी श्रद्धालुं गी अज्ज पहलगाम ते बालटाल आहले रस्तेया अगगे जाने दी इजाजत नेईं दिती गई। तोआईं मौसम दे खराब सूरतेहाल दे मददेनज़र कल 31 जुलाई गी जम्मू दे भगवती नगर आधार शिविर थमां कुसै बी जत्थे गी कश्मीर घाटी लेई रवाना नेईं कीता जाहग। जम्मू दे डिवीजनल कमिशनर रमेश कुमार होरे दस्सेआ ऐ जे एह फैसला श्रद्धालुं दी सुरक्षा दे मददेनज़र एहतियाती हीले दे तौर पर लैता गेआ ऐ। तोआईं इस बारे दी श्री अमरनाथ जी दी जातरा दरान अजे तोहड़ी बाबा बर्फानी दे दरबार च मत्था टेकने आहले दी गिनतरी 3 लख 93 जहार दे आंकड़े गी पार करी गई ऐ।

<><><><><><>

ISRO-NISAR

भारती अंतरिक्ष अनुसंधान संगठन-इसरो अज्ज सिंथेटिक अपरचर रडार उपग्रह निसार गी अंतरिक्ष च भेजोग। एह इसरो ते अमरीकी अंतरिक्ष एजेंसी नासा दा सांझा मिशन ऐ। एहदे च नासा दा एल-बैंड ते इसरो दा एस-बैंड रडार लगगे दा ऐ। आंध्र प्रदेश च श्री हरिकोटा दे सतीश

धवन अंतरिक्ष केंद्र थमां जीएसएलवी-एफ-16 राकेट दी मदाद कन्नै इसी अज्ज संझा 5 बज्जियै 40एं मिनटें पर गासै च छोड़ेआ जाग। इस मिशन दा मकसद हर 12एं दिनें पर पूरी धरती ते एहदी अंदरूनी हलचल पर बरीकी कन्नै निगरानी रक्खना ते निरीक्षण करना ऐ। एहदे'नै जलवायु परिवर्तन, शोध ते आपदा कार्रवाई लेई बधिया मय्यार दि'आं भलेआं साफ-स्पष्ट फोटू ते आंकड़े उपलब्ध होई सकडन। निसार अपनी भलेयां नमीं तकनीक ते प्रणाली राएं धरती दी सतह ते धरती दे हेठ दी मैपिंग करोग ते उत्थे होने आहिलएं गतिविधिएं ते प्रक्रियाएं दे बारै च वैज्ञानिक जानकारी उपलब्ध करोआग। एहदे अलावा निसार दी मदाद कन्नै धरती ते धरती पर मजूद बर्फू दे बड़्डे-बड़्डे प्हाड़ें जिनें'गी ग्लेशियर आखेआ जंदा ऐ, उंदे च होआ'रदे बदलाव दा बी निरीक्षण होग।

<><><><><><>

CS-SSK

मुख्य सचिव अटल डुल्लू होरें जम्मू ते श्रीनगर आहले सिविल सचिवालय च कायम उपराज्यपाल हुंदे सैनिक सहायता केंद्र बारै इक उच्च सतह दी बैठक लाई। इस केंद्र दा मकसद जम्मू-कश्मीर कन्नै जुड़े दे सैनिकें गी उंदी समस्याएं दे हल ते मदद उपलब्ध करोआने लेई मंच उपलब्ध करोआना ऐ। एहदी असरदार ढंगगै सिर अमलावरी यकीनी बनाने लेई मुख्य सचिव होरें गृह मैहकमें दे प्रिंसीपल सेक्रेटरी हुंदी अध्यक्षता च निगरान कमेटी कायम करने दी हिदायत कीती। गृह मैहकमा एहदी नोडल एजेंसी दे तौर पर कम्म करोग।

<><><><><><>

Joint-Committee

जम्मू ब्हाई अड्डे कश पखेरुएं सरबन्धी समस्या कन्नै निब्वड़ने लेई इक सांझी कमेटी दा गठन कीता गेआ ऐ। इस बारै डिविजनल कमिशनर रमेश कुमार हुंदी अध्यक्षता च बैठक लग्गी। इस कमेटी दी अध्यक्ष जम्मू दे ए.डी.डी.सी शेर सिंह होर करडन। जेडीए, जेएमसी, कंटोनमेंट बोर्ड, ए.ए.आई ते वायु सेना स्टेशन जम्मू थमां एहदे च मिम्बर होडन। एह कमेटी फील्ड विजिट करोग ते इक हफ्ते दे अंदर अपनी रिपोर्ट जमा करोआग ते एहतियाती उपाएं बारै सुझा देग। ब्हाई अड्डे कश कचरा किट्ठे करने आहली थाहर करी मते पखेरु उत्थे औंदे न जेड़ा जे चिंता दा विशे ऐ। प्रशासन गी एहदे लेई लोड़चदे हीले करने ते जागरूकता अभियान चलाने लेई आखेआ गेआ ऐ।

<><><><><><>

Weather

मौसम विभाग नै अज्ज जम्मू-कश्मीर दिएं किश थाहें पर बड़ी तेज बरखा बरने ते अंधी-झक्खड़ दे असार जताए न। विभाग नै आखेआ ऐ जे इस दरान किश थाहें पर चानचक्क हाड़ औने, ल्हास-पस्सियां पौने ते प्हाड़ें परा कुप्पड़ पौने दी बी शेंका ऐ। खतरे दी शेंका आहले इलाके दे बसनीकें गी सलाह दिती गई ऐ जे ओह सोहके-सतर्क रौहन ते बेवजह सफर थमां परहेज करन। आपदा प्रतिक्रिया टीमें गी तैयार रक्खेआ गेदा ऐ तांजे कुसै बी माड़े हालात कन्नै तुरत निब्वड़ेया जाई सकै।

<><><><><><>